

**KANTON SARAJEVO****SKUPŠTINA KANTONA SARAJEVO****NAROD I PRAVDA****Arijana Memić, zastupnica****Vlada Kantona Sarajevo****PREDMET: INICIJATIVA**

Pokrećem inicijativu da se Vlada Kantona Sarajevo (nadležne službe), aktivno uključe u rješavanje problema sa grijenjam u Historijskom muzeju BiH u Sarajevu.

**Obrazloženje:**

Historijski muzej BiH u Sarajevu osnovan je davne 1945. godine. Jedna je od 7 institucija kulture od državnog značaja kojima još uvijek nije riješen pravni status, a time ni stabilan izvor finansiranja. Historijski muzej ni 24 godine od prestanka ratnih dejstava još uvijek nema grijanje. Do 1992. muzej je posjedovao vlastiti sistem grijanja koji je devastiran u toku ratnih dejstava. Kotlovnica koja je pokretala tadašnji sistem grijanja danas se nalazi u kafiću Tito koji je iznajmljen privatnom licu tako da muzej nema pristup istoj. Ukupan prostor koji muzej ima na raspolaganju je cca 3000 metara kvadratnih. Mašinski fakultet radio je studiju izvodljivosti i predložili su nekoliko varijanti. Postoji i mogućnost spajanja/naslanjanja na sistem grijanja u Zemaljskom muzeju koji je na sistemu grijanja zgrade Parlamenta BiH.

Historijski muzej BiH se bavi prikupljanjem, čuvanjem, istraživanjem, prezentacijom i promovisanjem kulturno-historijskog naslijeđa Bosne i Hercegovine. Danas važi za jedinstvenu instituciju kulture u Bosni i Hercegovini, koja publici nudi programe i aktivnosti pomoću kojih se kroz muzejske predmete, priče i prostore, a i kroz dijalog govori o prošlosti, sadašnjosti i budućnosti. Tokom cijele 2019. Historijski muzej BiH je uspio, bez obzira što nemaju, iz već poznatih razloga, ni status ni sigurno finansiranje, organizovati brojne izložbe, manifestacije, susrete... ali u zimskom periodu zbog niskih temperatura muzej radi u otežanim okolnostima.

Muzej posjeduje oko 400.000 eksponata; vrijedne zbirke umjetničkih slika, fotografija, dokumenata, knjiga koje su osjetljive na temperaturne razlike. Primjera radi, optimalna temperatura za arhivsku građu i foto dokumentaciju je između 13 i 18 °C sa relativnom vlažnoću za arhivsku građu 60% i foto dokumentaciju 30%.

Stoga postoji realna opasnost da dio tog blaga izgubimo usljed nemogućnosti adekvatnog održavanja. Iako imaju mali broj uposlenih, ulažu maksimalane napore kako bi u promjenljivim vremenskim uslovima zaštitili kuturno blago od propadanja.

Bez obzira što Historijski muzej BiH nije Kantonalna ustanova, pomaganjem u rješavanju problema sa grijanjem u zimskom periodu pomogli bismo očuvanju arhivske građe, artefakata i umjetničkih djela nemjerljive vrijednosti koje slobodno možemo nazvati kulturno-historijskim i nacionalnim blagom Bosne i Hercegovine.

Pomoć Historijskom muzeju BiH u rješavanju problema sa grijanjem omogućilo bi uposlenicima da rade u punom kapacitetu što bi, zauzvrat, upotpunilo turističku ponudu Kantona Sarajevo i u zimskom periodu.

19.11.2019.godine

Zastupnica u Skupštini KS

Arijana Memić